

Paglaom pinaagi ni Jesukristo

Nganong ako nagkinahanglan sa tabang ni Jesukristo aron mahimong hingpit?

Si Elder J. Devn Cornish sa Seventy mipakigbahin:



Ang atong mga miyembro kanunayng mangutana, “Igo ba ang akong kamaayo isip tawo?” o “Makasulod ba gyud ko sa celestial nga gingharian?” Siyempre, walay matawag nga “igo ang kamaayo.” Walay usa nato nga mahimong “makakuha” o “angayan” sa atong kaluwasan, apan normal lang nga maghunahuna kita kon madawat ba kita sa Ginoo, nga maoy akong pagsabot niini nga mga pangutana. . . .

Akong himoong direkta ug klaro. Ang mga tubag sa mga pangutana nga “Igo ba ang akong kamaayo?” ug “Makasulod ba ko didto?” mao ang “Oo! Mahimong igo ang inyong kamaayo” ug “Oo, makasulod mo didto basta padayon kamong maghinulsol ug dili mangatarungan o mosukol.” Ang Dios sa langit dili usa ka walay pagbati nga referee nga mangita og rason nga mapagawas kita sa dula. Siya ang atong hingpit nga mahigugmaong Amahan, nga nangandoy labaw sa tanan nga ang tanan Niyang mga anak makauli ug makapuyo uban Kaniya isip mga pamilya sa kahangtoran. Tinud-anay Siyang mihatag sa Iyang Bugtong Anak aron dili kita malaglag apan makabaton og kinabuhing walay kataposan! Palihog tuo, ug palihog pagkuha og paglaom ug kahupayan gikan niining mahangtorong kamatuoran. Gusto sa atong Langitnong Amahan nga makasulod kita didto! Kana ang Iyang buhat ug ang Iyang himaya. (J. Devn Cornish, “Igo Ba Ang Akong Kamaayo? Makasulod Ba Ko Didto?,” *Liahona*, Nob. 2016, 32–33)

Unsa man ang akong mabuhat aron “mahimong hingpit pinaagi ni Jesus”?

Si Sister Carol F. McConkie, kanhi sa Kinatibuk-ang Kapangulohan sa Young Women, mitudlo:



Ang atong paglaom sa pagkabalaan nasentro diha ni Kristo, sa Iyang kaluoy ug sa Iyang grasya. Uban sa hugot nga pagtuo kang Jesukristo ug sa Iyang Pag-ula, malimpyo kita, walay lama, kon ilimod nato sa atong mga kaugalingon ang tanan nga dili diosnon [tan-awa sa Moroni 10:32–33] ug sinsero nga maghinulsol. Gibunyagan kita pinaagi sa tubig alang sa kapasayloan sa mga sala. Ang atong mga kalag gibalaan sa dihang gidawat nato ang Espiritu Santo uban sa bukas nga mga kasingkasing. Kada semana, nag-ambit kita sa ordinansa sa sakramento. Diha sa espiritu sa paghinulsol uban ang sinserong mga tinguha alang sa pagkamatarong, nakigsaad kita sa pagdala diha kanato sa ngalan ni Kristo, paghinumdom Kaniya, ug paghupot sa Iyang mga sugo aron sa kanunay makabaton sa Iyang Espiritu uban kanato. Sa kadugayan, samtang kita maninguha nga mahiusa sa Amahan, sa Anak, ug sa Espiritu Santo, mahimo kitang tig-ambit sa Ilang diosnong kinaiyahan [tan-awa sa 2 Pedro 1:4]. (Carol F. McConkie, “Ang Katahom sa Pagkabalaan,” *Liahona*, Mayo 2017, 10)

Si Elder Dale G. Renlund sa Korum sa Napulog Duha ka Apostoles mitudlo:



Mas naghunahuna ang Dios kon si kinsa kita ug kinsa kita sa umaabot, kay sa unsa kita kaniadto. Gusto Niya nga kita magpadayon sa pagpaningkamot. (Dale G. Renlund, “Ang mga Santos sa Ulahing mga Adlaw Magpadayon sa Pagpaningkamot,” *Liahona*, Mayo 2015, 57)